

CONVENIO DE COLABORACIÓN ENTRE A CONSELLERÍA DE ECONOMÍA, EMPREGO E INDUSTRIA DA XUNTA DE GALICIA E CÁRITAS DIOCESANA DE MONDOÑEDO – FERROL PARA A ACREDITACIÓN DA FORMACIÓN IMPARTIDA POR CÁRITAS NO MARCO DO SEU CONVENIO COA FUNDACIÓN ENDESA

Santiago de Compostela, 7 de abril de 2017

COMPARECEN

Por unha banda,

Francisco José Conde López, conselleiro de Economía, Emprego e Industria, nomeado polo Decreto 148/2016, do 13 de novembro, en representación da Xunta de Galicia, actuando en virtude das facultades atribuídas polo artigo 34.1 da Lei 1/1983, do 22 de febreiro, de normas reguladoras da Xunta e da súa presidencia e polo Decreto 175/2015, do 3 de decembro, polo que se establece a estrutura orgánica da Consellería de Economía, Emprego e Industria, e do establecido no Acordo do Consello da Xunta de Galicia do 27 de marzo de 1991.

E por outra,

Josefina Rebés Torra, , en representación de Cáritas Diocesana de Mondoñedo - Ferrol,

Ambas partes recoñécense con capacidade xurídica para actuar no presente acto e

EXPOÑEN

PRIMEIRO.- Que entre as competencias que en materia laboral lle corresponden á Comunidade Autónoma de Galicia, conforme ao establecido no artigo 29.1 do Estatuto de Autonomía de Galicia, está a da promoción do emprego e a formación profesional ocupacional, tendo atribuído o seu exercicio a Consellería de Economía, Emprego e Industria, de conformidade co establecido no Decreto 69/1993, do 10 de marzo, de asunción e asignación das funcións e servizos transferidos en materia de formación profesional ocupacional.

Que, co obxectivo de dar resposta eficaz ás demandas do mercado de traballo na promoción de novas oportunidades de emprego e tendo en conta que se considera a Formación Profesional como un instrumento básico dentro das políticas activas, é necesario promover unha oferta de formación profesional conducente a potenciar a inserción e reinserción profesional da poboación demandante de emprego en risco de exclusión social,

mediante a cualificación, recualificación ou posta ao día das súas competencias profesionais.

SEGUNDO. - Que Cáritas Diocesana de Mondoñedo – Ferrol, ; e entre as súas actividades está desenvolver programas que atendan aos distintos grupos sensibles,

TERCEIRO. - Que Cáritas Diocesana de Mondoñedo – Ferrol desenvolve desde o ano 2002 un programa de Emprego dirixido a mellorar a empregabilidade das persoas con dificultades sociolaborais, e que unha das liñas de acción de dito programa diríxese principalmente a formar persoas con dificultades de acceso ao sistema de formación público.

CUARTO. - Que desde o curso pasado, Cáritas Diocesana de Mondoñedo – Ferrol imparte o curso Operacións auxiliares de montaxe de instalación electrotécnicas e de telecomunicacións en edificios, código ELES0208, (Real Decreto 638/2011, do 13 de maio), en convenio coa Fundación Endesa.

QUINTO. - Que o proxecto de Cáritas Diocesana de Mondoñedo – Ferrol consiste na elaboración e impartición dun curso que contribúa a mellorar a baixa cualificación profesional dun grupo de 12 persoas, participantes no Programa de Emprego de Cáritas Diocesana de Mondoñedo – Ferrol, facendo fincapé en persoas que estean nunha situación de risco de exclusión social.

Unha vez finalizada a acción formativa, Cáritas Diocesana de Mondoñedo – Ferrol contempla a xestión e posta en marcha de prácticas profesionais en empresas do sector. Ditas prácticas serán subvencionadas e concedidas ás persoas participantes que obtivesen os mellores resultados en canto ás súas cualificacións, participación, interese, motivación, e que por as súas condicións sociais, familiares e económicas teñan dificultades para acceder a un emprego. Deste xeito actuarán nun proceso máis longo que lles permita acercarse aos seus obxectivos laborais, á vez que darlles o apoio económico e motivación necesarios para que se manteñan no mercado laboral.

SEXTO. - Que Cáritas Diocesana de Mondoñedo – Ferrol asumirá todos os gastos derivados da realización do antedito curso, que costeará a través dun convenio de colaboración coa Fundación Endesa.

Establécese a seguinte acción no ámbito da comarca de Ferrol:

Operacións auxiliares de montaxe de instalación electrotécnicas e de telecomunicacións en edificios. Código ELES0208. Nivel 1. Duración 398 horas.(Real Decreto 638/2011, do 13 de maio)

Na implantación práctica dos itinerarios observaranse en todo caso, os requirimentos recollidos no certificado de profesionalidade correspondente.

SÉTIMO.- As dúas institucións comparten a crenza de que o mellor e o investimento prioritario é o capital humano. No momento actual é preciso actuar conxuntamente e tomar medidas combinadas que supoñan a optimización dos recursos previstos polas diferentes administracións e entidades para incentivar e dinamizar o mercado e fomentar as cualificacións dos recursos humanos e por ilo acordan sentar as bases, definidas nas cláusulas que a continuación se recollen, para que o itinerario de formación recollido na cláusula primeira deste convenio, leve á acreditación a través da expedición do correspondente certificado de profesionalidade, que en todo caso será emitido polo órgano competente da Comunidade Autónoma de Galicia, despois de cumprir os requisitos previstos para iso no presente convenio.

CLÁUSULAS:

PRIMEIRA.- OBXECTO DO CONVENIO

O obxecto do presente convenio é articular unha colaboración entre a Consellería de Economía, Emprego e Industria e Cáritas Diocesana de Mondoñedo – Ferrol, que recolla as características e condicións que debe reunir a formación impartida a través do itinerario formativo asociado ao certificado de profesionalidade de *Operacións auxiliares de montaxe de instalación electrotécnicas e de telecomunicacións en edificios*, establecido no Real decreto 683/2011, do 13 de maio, co obxecto da súa acreditación oficial a través da expedición do correspondente Certificado de Profesionalidade.

A formación impartida ao abeiro deste convenio desenvolverá todos os módulos formativos incluídos no certificado de profesionalidade sinalado.

Os medios e materiais didácticos, o cadro docente e os locais onde se impartirá a formación responderán os requirimentos esixidos no Real decreto que regulan o certificado de profesionalidade correspondente ao dito itinerario.

SEGUNDA.- OBRIGACIÓNS DE CÁRITAS DIOCESANA DE MONDOÑEDO –FERROL

CÁRITAS DIOCESANA DE MONDOÑEDO - FERROL obrígase mediante o presente convenio, a desenvolver o itinerario formativo incluído no certificado de profesionalidade, recollido no apartado primeiro do presente convenio, cumprindo cos requisitos esixidos na normativa de referencia.

Sinaladamente, comprométese a:

1.- Comunicar á xefatura territorial da Consellería de Economía, Emprego e Industria da Coruña o calendario de desenvolvemento da acción formativa a impartir, o centro de traballo onde se realizarán as prácticas, o programa formativo en formato normalizado, co desenvolvemento de cada un dos módulos formativos que comprende a acción formativa a

impartir, a duración e os equipamentos necesarios, e a relación dos docentes cos respectivos currículos. Ao finalizar as accións formativas comunicará a relación do alumnado que finalizou o curso con avaliación positiva.

2.- Realizar a selección de alumnos utilizando como criterios de selección o cumprimento dos requisitos esixidos polo certificado e a pertenza ao colectivo de persoas en risco de exclusión social.

3.- Que a formación se desenvolva na Aula Taller de electricidade de 165 m² do Centro de Formación Ocupacional de Ferrol, pertencente á Consellería de Economía, Emprego e Industria para a impartición da especialidade formativa referida no presente convenio.

As actividades iniciaranse o 19 de abril de 2017 ata a súa finalización o día 21 de agosto de 2017, en quenda de tarde de 16:00 a 21:00 horas.

4.- Someterse ás actuacións de supervisión e control que, en calquera momento, poidan acordar os servizos competentes das Consellería de Economía, Emprego e Industria, así como todas aquelas actuacións de avaliación, seguimento e control esixidas polo Real decreto 34/2008, do 18 de xaneiro, polo que se regulan os certificados de profesionalidade.

5.- Impartir o módulo de formación práctica en centros de traballo, segundo o previsto no artigo 5bis do Real decreto 34/2008, de 18 de xaneiro, polo que se regulan os certificados de profesionalidade e comunicar á Consellería de Economía, Emprego e Industria os convenios de colaboración cos mencionados centros de traballo. O titor deste módulo será o designado por Cáritas Diocesana de Mondoñedo - Ferrol entre os formadores ou tutores-formadores que impartirán os módulos formativos do certificado de profesionalidade correspondente, e será responsable de acordar co titor designado pola empresa o programa formativo deste módulo. Para establecer o programa formativo consideraranse as capacidades, criterios de avaliación e contidos establecidos para este módulo no certificado de profesionalidade. O devandito programa debe incluír criterios para a avaliación observables e medibles, e recoller, polo menos, a información que se indica no Anexo VIII da Orde ESS/1897/2013, de 10 de outubro, pola que se desenvolve o Real decreto 34/2008, do 18 de xaneiro, polo que se regulan os certificados de profesionalidade. O seguimento e a avaliación dos alumnos realizarase conxuntamente polo titor de Cáritas Diocesana de Mondoñedo - Ferrol, o titor designado pola empresa e o responsable da empresa, segundo o modelo que figura no anexo IX da Orde ESS/1897/2013, de 10 de outubro.

6.- Que todo o persoal docente, participante na formación, reúna as prescricións sobre formación e experiencia profesional recollidas no Real decreto 683/2011, do 13 de maio.

Cada módulo formativo do certificado poderá ser impartido, como máximo, por dous formadores, que deberán acreditar o cumprimento dos requisitos que se establezan para cada módulo formativo no antedito real decreto.

7.- Avaliar ao alumnado por módulos formativos de forma sistemática e continua, co obxecto de comprobar os resultados da aprendizaxe e en consecuencia, a adquisición das competencias profesionais, remitindo o acta de avaliación cos resultados obtidos polos alumnos/as, indicando se adquiriron ou non as capacidades en cada módulo formativo, no prazo máximo de 3 meses, segundo o establecido no artigo 14 do Real decreto 34/2008, do 18 de xaneiro, polo que se regulan os certificados de profesionalidade, e no modelo especificado no anexo VII na Orde ESS/1897/2013, do 10 de outubro, pola que se desenvolve o Real decreto 34/2008, do 18 de xaneiro.

8.- Remitir a documentación que se requira para os procesos de seguimento e control da calidade das accións formativas, segundo o establecido nos artigos 14 e 18 do RD 34/2008, que regula os certificados de profesionalidade, e nos capítulos I e II do Título III da Orde ESS/1897/2013, do 10 de outubro.

9.- Asesorar na tramitación da solicitude dos certificados de profesionalidade a todas as persoas que cumprindo os requisitos de acceso á formación, a finalicen con avaliación positiva.

10.- Desenvolver a formación aquí recollida cos seus medios económicos, que costeará a través dun convenio de colaboración coa Fundación Endesa.

TERCEIRA.- COMPROMISOS DA CONSELLERÍA DE ECONOMÍA, EMPREGO E INDUSTRIA

1.- A Consellería de Economía, Emprego e Industria comprométese a expedir os correspondentes certificados de profesionalidade, a quen o solicite e demostre superar todos os módulos correspondentes ao devandito certificado, a través da formación impartida por esta entidade correspondente aos itinerarios de formación recollidos no punto primeiro deste convenio, unha vez comprobado o cumprimento dos requisitos esixidos no presente convenio e na normativa reguladora dos certificados de profesionalidade.

En ningún caso, a Consellería de Economía, Emprego e Industria adquirirá ningunha responsabilidade respecto daquelas persoas que puidesen participar na formación sen reunir os requisitos de acceso esixidos polos certificados de profesionalidade nin ningún compromiso ou responsabilidade económica derivada do desenvolvemento e/ou xestión da mesma.

2.- A Consellería de Economía, Emprego e Industria autoriza a ocupación temporal da Aula Taller de electricidade de 165 m² do Centro de Formación Ocupacional de Ferrol, do 3 de abril de 2017 até o 19 de xullo de 2017, para o desenvolvemento das actuacións contidas neste convenio.

CUARTA.-COMISIÓN MIXTA DE SEGUIMIENTO

Constitúese unha comisión mixta para o seguimento do presente convenio, formada polo conselleiro de Economía, Emprego e Industria ou persoa en quen delegue e un funcionario da Dirección Xeral de Orientación e Promoción Laboral, a directora de Cáritas Diocesana de Mondoñedo – Ferrol e un técnico/a designado por ela.

Esta Comisión exercerá principalmente as seguintes funcións:

- Interpretación e resolución de cantas dúbidas ou conflitos se formulan na interpretación do presente convenio e a súa aplicación.
- Vixilancia e seguimento do cumprimento do presente convenio.

De igual maneira, poderán asistir ás reunións desta comisión os expertos que se designen en cada caso polas partes, e cuxa presenza se considere necesaria para o mellor desenvolvemento dos traballos. Con todo, a presenza dos devanditos expertos circunscribírase á súa calidade de asesores, non tendo en ningún caso dereito a voto, nin os dereitos executivos que corresponden aos membros da devandita comisión.

Das reunións da comisión mixta de seguimento levantarase, no seu caso, acta na que se reflectan de maneira escrita e detallada os acordos adoptados polos seus membros e o seguimento dos mesmos.

QUINTA.- CONFIDENCIALIDADE E TRATAMENTO DE DATOS PERSOAIS

As partes comprométense a manter estrita confidencialidade respecto de calquera información que lles sexa subministrada en méritos do presente convenio, a non ser que por parte das mesmas se autorizase expresamente a súa difusión.

Este compromiso de confidencialidade farase extensible ao tratamento de calquera outros datos e informacións de carácter persoal a que as partes puidesen ter acceso como consecuencia da execución do presente convenio. Neste sentido as partes comprométense a cumprir adecuadamente e, en todo momento, as disposicións contidas na Lei Orgánica 15/1999, do 13 de decembro, de Protección de Datos de Carácter Persoal (en diante, “LOPD”), así como no Real Decreto 1720/2007, do 21 de decembro, polo que se aproba o Regulamento de desenvolvemento da LOPD, e en calquera outras normas vixentes ou que no futuro poidan promulgarse sobre a devandita materia, comprometéndose a deixar indemne á outra parte de calquera responsabilidade que se puidese declarar como consecuencia do incumprimento das obrigacións que en materia de protección de datos de carácter persoal lles incumben a cada unha delas.

En particular, se para o correcto desenvolvemento da colaboración determinada no presente Convenio, CÁRITAS DIOCESANA DE MONDOÑEDO -FERROL facilítase ou dese acceso á Xunta de Galicia a datos de carácter persoal, ou a Xunta de Galicia facilítase ou dese acceso a CÁRITAS DIOCESANA DE MONDOÑEDO -FERROL a datos de carácter persoal, este acceso será realizado en todo momento de conformidade co establecido na normativa vixente en materia de protección de datos, en virtude do establecido no artigo 12 da LOPD, en

función do cal se determina que a parte que, no seu caso, tivese acceso aos devanditos datos asumiría as seguintes obrigacións:

- Non aplicar ou utilizar os datos persoais para fins distintos aos que figuren no presente Convenio, nin cedelos nin sequer para a súa conservación a outras persoas.
- Gardar segredo profesional respecto dos mesmos, aínda despois de finalizar a colaboración delimitada polo presente Convenio.
- Cumprir en todo momento coas prescricións establecidas pola lexislación vixente en materia de protección de datos e trasladar as obrigacións citadas nos parágrafos anteriores ao persoal que colabore e interveña no desenvolvemento das accións que se deriven do cumprimento do presente Convenio.
- Cumprida a colaboración delimitada polo presente Convenio, deberá destruír todos os datos de carácter persoal tratados, de forma que non poidan resultar recuperables nin reutilizables de ningún xeito.

SEXTA.- NATUREZA DO CONVENIO

O presente Convenio é de natureza administrativa, e rexerase nos seus efectos polo establecido nas súas cláusulas e nos artigos 47 e seguintes da Lei 40/2015, do 1 de outubro, de réxime xurídico do sector público, aplicándose os principios do Real Decreto Lexislativo 3/2011, do 14 de novembro, polo que se aproba o texto refundido da Lei de Contratos do Sector Público, para resolver as dúbidas e as lagoas que se presenten, de acordo co artigo 4.2 da citada lei.

A Administración pública autonómica gozará de todas as prerrogativas inherentes á natureza administrativa do convenio.

As cuestións litixiosas xurdidas acerca da súa interpretación, modificación e resolución do convenio, serán resoltas pola Consellería de Economía, Emprego e Industria, poñendo os seus acordos fin á vía administrativa.

Contra estes acordos poderá interpoñerse recurso potestativo de reposición, segundo o disposto na Lei 39/2015, do 1 de outubro, do procedemento administrativo común das administracións públicas ou directamente recurso contencioso-administrativo, de acordo co disposto na Lei 29/1998, do 13 de xullo, reguladora da xurisdición contencioso-administrativa.

SÉTIMA.- REXISTRO

O presente convenio será obxecto de inscrición no rexistro de convenios da Xunta de Galicia, tal e como establece o Decreto 126/2006, do 20 de xullo, polo que se regula o Rexistro de Convenios da Xunta de Galicia.

OITAVA.- EXTINCIÓN OU RESOLUCIÓN DO CONVENIO

Son causas de extinción ou resolución do presente convenio:

- a) O incumprimento por calquera das partes das súas cláusulas.
- b) A alteración substancial das condicións que propiciaron a súa celebración.
- c) O mutuo acordo

En caso de extinción ou resolución do convenio, calquera que fose a súa causa, as actuacións ás que vén referido o seu texto, e que no momento da resolución ou extinción se atopasen en curso de realización, continuarán o seu desenvolvemento ata a súa finalización.

NOVENA.- CONSENTIMENTO DA PUBLICACIÓN NO PORTAL DA TRANSPARENCIA E GOBERNO ABERTO

As persoas asinantes outorgan o seu consentimento para que os seus datos persoais que constan neste convenio, así como o resto das especificacións nel contidas, poidan ser publicadas no Portal de Transparencia e Goberno Aberto, de acordo co que determinan o artigo 29 da Lei 1/2016, do 18 de xaneiro, de transparencia e bo goberno.

DÉCIMA.- VIXENCIA DO CONVENIO

O presente convenio entrará en vigor na data da súa sinatura e estará vixente ata o 21 de agosto de 2017, sempre que non medie denuncia algunha das partes, formulada de forma fidedigna con tres meses de antelación, ou se dea por finalizado en calquera momento anterior por mutuo acordo entre as partes, previa comunicación polo menos cun mes de antelación, ou por causa de forza maior.

E, en proba da súa conformidade, as partes asinan este documento, por triplicado exemplar, na data e lugar indicados no encabezamento.

Pola Consellería de Economía, Emprego e
Industria

Por Cáritas Diocesana de Mondoñedo -
Ferrol

Francisco José Conde López

Josefina Rebés Torra